

**DODATAK**

**GRAČANIČKI GLASNIK**  
časopis za kulturnu  
historiju

Broj 41, godina XXI  
maj, 2016. [str. 5-6]

© Monos 2016

# Glosar novih autora

**Fatima Bećarević**, magistar humanističkih nauka za područje književnosti. Rođena u Gračanici 1986. godine. Zvanje profesora bosanskog jezika i književnosti stekla je na Univerzitetu u Tuzli 2009. godine. Na istom univerzitetu, 2013. godine odbranila je magistarsku tezu pod nazivom “Konstrukcije narativnih identiteta u pripovjedačkom opusu Alije Nametka” pod mentorstvom dr.sc. Mevlide Đuvić. Učesnik je Drugog bosanskohercegovačkog slavističkog kongresa u Sarajevu na kome je izlagala rad na temu “Konstrukcije narativnih identiteta u pripovijeci “Put Alije Đerzeleza” Ive Andrića”. Radila je kao profesor u osnovnim i srednjim školama na području općine Gračanica. Od 2010. godine član je Udruženja mladih ANEA-MG u okviru kojeg radi na projektima vezanim za kulturu i edukaciju mladih. Jedan je od osnivača dramske sekcije u Udruženju mladih ANEA-MG u okviru koje se bavi režijom. Zajedno sa članovima ove sekcije realizovala je osam pozorišnih predstava. Bavi se dramatisacijom, lektorisanjem i uređivanjem tekstova. Učesnik je više edukativnih programa realizovanih u saradnji sa Fondacijom Mozaik, British Council, Britanskom ambasadom, Kultom, SFF, Fondacijom 787, Njemačkom i Norveškom ambasadom. Radila je kao moderator na književnim večerima sa Ivanom Lovrenovićem, Nedžadom Ibrahimovićem i Irfanom Horozovićem. U budućnosti planira nastaviti usavršanje u okviru teorija kulture i identiteta.

**Nurdin Bešić – Dino**, likovni pedagog, rođen 07.09.1962 u Poriječju, općina Doboje. Slikarstvom se bavi još od osnovne škole koju je završio u Poriječju i Grapskoj, a srednju u Doboju. Fakultet nastavnčkog smjera završio u Mostaru. Pored toga, bavi se i fotografijom. Prve samostalne i grupne izložbe imao je u Hrvatskoj gdje je živio i radio do rata. Tokom rata nije prekidao sa slikanjem i pored aktivnog učešća u odbrani zemlje BiH. Poslije teškog ranjavanja radi kao upravnik “Spomen-sobe Doboje Istok gdje je organizovao nekoliko izložbi na temu “Borci-stvaraoci”, bio je organizator različitih kulturno -sportskih aktivnosti na tadašnjim slobodnim teritorijama. Poslije rata radi u organizaciji projekta omladinskog centra u Doboje Istoku, “Psihosocijalna pomoć za djecu i omladinu.” Nakon toga do dan

**DODATAK**

danas radi u prosvjeti kao nastavnik likovne kulture. Stalni je učesnik likovne manifestacije "Umjetnosti minijature BiH", koja se održava svake druge godine u Tuzli. Slike radi u raznim tehnikama, naročito akrilnim i uljanim bojama. Njegovi slikarski motivi su različiti: sa elementima realizma, impresionizma i apstrakcije. U nekim ciklusima dominiraju motivi kulturnog naslijeđa. Mnoge njegove slike razasute su po privatnim kolekcijama u inostranstvu.

**Esmer Drkenda**, rođen je 1985. godine u Sarajevu, gdje završava osnovno i srednje obrazovanje. Diplomirao je historiju 2010. godine na Istanbul Univerzitetu. Magistrirao je na istom univerzitetu 2013. Trenutno je zaposlen kao viši asistent na Pravnom fakultetu Univerziteta u Travniku za užu naučnu oblast historijskopravnu. Bavi se proučavanjem Islamskog i osmanskog prava.

**Almir Mutapčić**, bachelor arheologije, rođen je 14. septembra 1991. godine u Gračanici, općina Gračanica. Nastanjen u Sladnoj, općina Srebrenik. Osnovnu školu završio u Sladnoj a gimnaziju u Srebreniku. Godine 2010. upisuje dodiplomski studij arheologije na Filozofskom fakultetu u Sarajevu, na katedri za arheologiju, koji završava u septembru 2014. godine. Trenutno radi kao pripravnik – volonter u Zavodu za zaštitu i korištenje kulturno – historijskog i prirodnog naslijeđa Tuzlanskog kantona u Tuzli.

**Mirko Pejanović**, akademik, rođen je 1946. g. u Matijevićima, opština Kladanj. Nakon završetka osnovne škole (u Stuparima,) i učiteljske školu u Tuzli, upisao je i završio redovni studij Sociologije na Fakultetu političkih nauka Univerziteta u Sarajevu, na kojem je, poslije uspješno završenog postdiplomskog studija i doktorirao, 1988. godine.

U višedecenijskom nastavno-naučnom radu bio je profesor na Odsjeku za politologiju Fakulteta političkih nauka i saradnik fakultetskog Instituta za društvena istraživanja. Predavao je na sljedećim predmetima: *Lokalna i regionalna samouprava; Evropske*

*integracije, Teorijski koncepti i modeli lokalne samouprave u državama Evropske unije; Javna uprava u BiH; Participacija građana u odlučivanju o javnim poslovima u lokalnoj zajednici.* Imao je studijski boravak u izučavanju lokalne samouprave, 2000. godine, u Republici Sloveniji. Učestvovao je u izvođenju nastave na postdiplomskim i doktorskim studijama, bio mentor za desetine magistrskih radova i 8 doktorskih disertacija Bio je voditelj više naučno-istraživačkih projekata, čiji su rezultati štampani kao posebne studije u izdanju Fakulteta političkih nauka. Obavljao je i dužnost rukovodioca Odsjeka za politologiju kao i dužnost dekana Fakulteta političkih nauka, od 2007. do 2011. godine. U tom periodu je realizovao više projekata koji su omogućili primjenu Bolonjskog modela studija.

Od decembra 2012. član je Akademije nauka Bosne i Hercegovine i profesor emeritus na matičnom fakultetu. Član je Asocijacije nezavisnih intelektualaca "Krug 99" i Vijeća internacionalne lige humanista. Od juna 1992. do septembra 1996. godine bio je član Ratnog predsjedništva Republike Bosne i Hercegovine. Bio je član državne delegacije za pregovore na Mirovnoj Ženevskoj konferenciji od 1992. do sredine 1994. godine. Osnivač je i predsjednik Srpskog građanskog vijeća od 1994. do 2010. godine. Objavio je 11 knjiga i četiri knjige u koautorstvu, od kojih izdvajamo naslove: *Amerika i mirovno rješenje za Bosnu i Hercegovinu* (1995.), *Sadašnjost i politička budućnost Bosne i Hercegovine* (1997.), *Bosansko pitanje i Srbi u Bosni i Hercegovini* (1999.), *Politički razvitak Bosne i Hercegovine u postdejtonskom periodu* (2005.), *Država Bosna i Hercegovina i demokratija* (2015.). Autor je preko 100 naučnih radova, objavljenih u domaćim i inostranim časopisima. Objavio je i više desetina recenzija, osvrta i stručnih radova, bio organizator i aktivan učesnik na desetine naučnih skupova i konferencija u zemlji i inostranstvu.

**Momčilo Spasojević**, profesor jugoslovenskih književnosti, književnik i publicista, rođen je u selu Šnjegotini Velikoj 1947. godine, gdje je pohađao i završio osnovnu školu. Po završetku gimnazijskog školovanja upisuje studij jugoslovenskih književnosti u Novom Sadu, a potom postdiplomski studij sociologije književnosti u Beogradu. Jedno vrijeme radio je kao srednjoškolski profesor, a potom profesionalno kao politički i kulturni radnik u Tešnju. Danas živi u Čelincu. Po novinama, časopisima i zbornicima štampanu je veći broj književnih prikaza, osvrti, pripovjedaka, publicističkih i stručnih radova različite prirode. Objavio knjige: "Od života životu (misli)" 1986. godine; "Legende Pousorja", 1991. godine; "Ponoćne pjesme", 1996. godine; "Vjeronanja u Srba", 2001. godine; "Iskre u tami", 2003. godine; "Šnjegotina - prošlost, ljudi, život, običaji", 2004. godine; "Slavni u anegdotama", 2004. godine; "Hronika stradanja", (pripovijetke), 2006. godine; "Žena", (pripovijetke), 2008. godine. "Običaji u Srba", 2009. godine. Dobitnik je književne majske nagrade "Kosta Abrašević" Beograd, za kratku pripovijetku 1991. godine (posljednja jugoslovenska nagrada), nekoliko puta osvajao je književnu nagradu "Mladen Oljača" Glasa Srpske iz Banja Luke za najbolju kratku novinsku priču (2002, 2004. i 2005. godine), te književne nagrade "Prosvjete" iz Šamca (prvu nagradu 2007. godine); prvu nagradu Fondacije "Petar Kočić"

iz Dortmundu 2006. godine i nekoliko puta nagradu "Istina o Srbima" "Prosvjete" iz Gradiške (prvu 2006. godine), zatim nagradu za kratku priču "Marko Matinović Car" iz Viteza 2008. godine.

**Alen Zečević**, diplomirani profesor historije, rođen u Zenici 1989. godine. Diplomirao 2011. godine, na Odsjeku za historiju Fakulteta humanističkih nauka, Univerziteta "Džemal Bijedić" u Mostaru, na kojem je nastavio master studij - smijer Novi vijek i savremeno doba. Svoje radove objavljivao je u časopisima: Preporod (BiH), Behar (Hrvatska), Almanah (Crna Gora), Novo Vrijeme (BiH), Diwan (Luxemburg), i Sandžački zbornik. Sa radom "Vakufi hercegovačkih namjesnika i imućnih porodica i njihov značaj za urbani razvoj Hercegovine u 16. stoljeću", učestvovao je na međunarodnom naučnom skupu "Bošnjaci u Osmanskom carstvu", održanom u Sarajevu 20. decembra 2014. godine. Od ostalih radova izdvajaju se sljedeći: "Politički i ekonomsko-pravni položaj Bošnjaka 1918. – 1929.", "Bosansko pitanje u diplomatskim tokovima Velike istočne krize (1875. – 1878.)", "Prilog izučavanju urbanog razvoja Pljevalja u drugoj polovini 16. stoljeća", te rad "Štrosmajerova politika prema Bosni i Hercegovini i bosanskohercegovačkim muslimanima", koji uskoro izlazi u izdanju časopisa "Historijska traganja", Instituta za istoriju Sarajevo.